

摘藻堂四庫全書薈要

集部

欽定四庫全書薈要

集部

待制集卷十一



詳校官助教臣謝登雋

欽定四庫全書薈要卷一萬六千四百四十二

集部

待制集卷十一

元 柳貫 撰

墓誌銘

義方陳母丁孺人墓碣銘

并序

建安陳湔衰經踵門以謁自通於予予出與成禮退詢其故湔再拜起涕泗言湔喪母踰年哀未即死圖終窆窆之事今既卜得日湔之同門友蔣易實為湔謀所以

不死其親者曰易次而母諸行往求柳先生銘先生樂稱人之善其將有以假寵於而母矣誤持是而來惟先生之畀矜之也嗟乎予文詎能使而母昭昭於地下雖然起孝之志予其忍重違之按易狀孺人丁氏諱臨字淑道世籍建陽之嘉禾上里父諱澄號稱里長者孺人幼慧讀論語孝經孟子識其大意古人文字經目輒成誦處室時嘗學和詩伯父縣丞公戒曰婦人職知婦道詩非所宜習蓋終身服之不敢言文年二十四歸中里

陳君騰實君故仕宦家子又早孤時經喪亂橫賦重歛日暴月尅君素懦弱常破產應之家遂以削孺人入門檢括內計盡得孔隙曰此豈猶不可為乎稍出其智補室罅穴芟除薶翳未久而生道裕如閱十三年君即世孺人益自力于儉勤躬操簿書手執算籌雖一錢一孔之出入必使節葉可尋而根株可以覆按廣田疇新室廬諸凡潤飾先業有男子志慮所不能及者孺人子男四女一喪父時長纔十二而季猶未晬稍長入小學闢

塾曰義方堂延名師就講肄暇日則歷舉小學書立教
大指示警厲於諸子而怡怡奉親長不敢生驕易之句
又常常語及之他日子知博習女知順從人以為義方
之教然也孺人質敏而惡華簪珥服御不競妍好晨興
坐堂理家政問繇賦問米鹽言人人殊而出語應之各
中肯綮或時過午食不下咽僮隸意其倦且休矣而區
畫彌密滋無惰容大抵治家整肅內外斬斬踐其庭者
見其左蹈規矩右循繩尺而和氣充牧淫慝自無因而

入也陳氏族盛宋中興來常有顯者今浸遠浸湮里中
尚五十餘室孺人禮其尊老而慈其卑幼往來問遺無
愆節戚疎少長無間言比歲丙申丙午薦饑里民艱食
孺人既為粥以活饑者又下粟估稍賑卹其未陷于危
者病不能謁醫亦隨證注善藥予之曰毋庸使他人知
其施實德于鄉鄰固如此孺人嫠居三十年貞節潔行
足以表見于世里耆聚謀方欲列上其事請加旌復書
適具元統二年正月朔晨起焚香誦道釋經已忽覺體

卷十一
中小不佳就寢而疾作禱醫勿效子湔竭誠露禱刲豚
和糜以進亦輒勿效更十日卒得年六十又五子曰洵
曰澧曰涓曰湔涓早卒女和適崇安詹天增和先一年
亦卒孫男五元燾佛僧元亨元泰元顯孫女六初君之
喪孺人為卜藏室甫葬而涓天徵之堪輿家言咸謂不
利及三改卜兆域始宜孺人曰亡者得安其靈則生者
宜有蔭藉費雖巨吾敢屑較之哉凡甓窆而封陳牲而
虞肅賓製服飭具每益謹已又曰陰陽拘忌為人子弟

亦所宜知命泐因傳其書為其學焉於是泐所從授書者章貢劉君某復來為孺人謀相墓得某山之原維食卜用某月某日鑿窆某月某日掩坎卒之明年也易之狀曰易狀孺人之行得于宗老之賢者皆不謀同辭呼信然矣曩易從杜先生武夷概論節婦之被旌門者先生曰使世之公論不屈而有賢守令者出則若陳氏母之操行風節自當表而上之不然旌復之令何為者哉孺人已矣亦徒以重夫君子感今思古之情予是以序

而系之俾溥持歸請先生書而表諸墓上倘萬一適人之采焉則孺人之成教遺範猶足以衣被來世而陳氏之不遂泯泯者庶其有在于是銘曰

遭家孔艱亟返之安其智閒閒生日以遂養日以備殞於中世有子有孫宜于其家相維斯丘不沆不汚高四尺者孺人墓耶

澹居處士馬君墓碣銘

馬氏望扶風而再徙于南者惟新定新亭之族尤行以

碩禮部尚書公諱大同以政學顯宋淳熙間與紫陽文
公實交相引重詩書之澤洽于孫曾雖所資所藉有淺
有深大抵郁如也尚書伯兄諱大方六世得澹居處士
處士諱之純字希大卒以至順元年閏七月乙巳春秋
七十又六塋以明年二月某甲子兆在孝行鄉之望雲
原前塋嗣子恭命族子瑩為書一通著其行業即請於
所善東陽柳貫銘而瑒諸紳纚之碑貫幸嘗執筆隸奉
常職在諫行而攷辭諷事又知處士為厚德長者可銘

不誣乃系而銘之處士夷靖簡亮人也讀書務明體要不為章句繳繞視世俗豪攫智籠之術如疾狗偷屏羨黜浮自致饒裕然聞里黨間有一義可為奮勇赴之不誅不撓至元中有司嘗征商於野民甚病焉處士持牒懇行中書以為與民爭利非盛世事卒覆按除之大德丁未歲大祲處士傾廩以饋餓者掩骼以從禮制或欲上其名應出粟補官之令則厚謝曰吾知盡吾力敢微賞哉處士仲兄早卒鞠其子如已子子尋卒鞠其孫孫

又卒鞠其曾孫塋祭以禮婚娶以時植其門戶如初處
士聚書至數千卷畜古今法書名畫亦數百幅花時菊
景潔觴陳俎從賓客歡賞引滿徑醉蓋歲歲常然將死
語子若孫曰吾無愧于人人亦無憾于吾即就木安焉
耳計聞閭居野處之夫咸曰善人已矣吾將何賴處士
之配董氏亦有賢行卒先一年今舉以祔其域處士無
子以伯兄之子後命族子請銘者也孫男二禮禔孫女
一尚幼處士之曾大父諱崇大父諱鎔父諱熙孫皆隱

德弗耀曰澹居云者處士所自命也處士常患里中子弟為聲利塗塞耳目思一洗濯新之方將割田闢塾致明師宣昭經誼以大變其俗而竟齋志入地嗚呼怫哉處士之有蘊不試者如是是足以表世燾後矣可無銘乎銘曰

士非盜名禮可求野不有耆碩孰起淪謝君子尸之適輓大雅今其亡矣有不亡者紹聞德言以祭于社相維斯丘孫曾受嘏

故平陽州判官陳君墓誌銘

釣臺書院山長陳士貞過貫泣拜言曰我先人早自奮
於仕道淹回州縣餘廿年方累聖繼明惠綏臣下推恩
進秩便蕃優渥而疾病侵凌薄于既耄卒以不偶死今
墓草幾宿而隧間之石未有刻辭夫子蓋嘗辱交焉倘
幸假茲鄉曲之誼畀之一言則先人有知將不悼其堙
鬱於土中也貫既拜而受言則退考鄉貢進士吳萊所
為事述撫其可書者序而銘之序曰君諱遠大字宏父

姓陳氏陳氏本出彭城中世南徙占籍于婺之浦江鄉
曰德政自君始又徙縣東北之興賢鄉村曰某村君少
從鄉先生學治經為尚書大義下筆無留思然好個儻
之畫策慨然欲有所為於時會邑里初內附山谷獷強
猶蜂蟻聚負固弄兵間則出相寇攘君曰吾其有以自效
即釋儒服去從軍首建購捕之方次陳綏靖之畧凶渠既
得餘孽悉平幕府上其功而君亦隨計至京師得試將
仕郎辰州路施容州判官未上而隣土有警郡復檄君

至麾下資其智勇多所俘獲大帥府材君之為而惜其
棄之遐陬復剡上之意將引以自近久迺改全州路清
湘縣丞在官八年稍進從仕郎贛州路信豐縣尹轉承
事郎溫州路平陽州判官于是君累官嶺海間風淫露
毒之所襲腰腳痺弱不良于行曰吾老矣不復有四方
之志矣因自免歸題其宴坐之室曰達觀幸賓客至則
命豆觴諧笑從容連日夕猶儒生故態也蹒跚勃窣居
十二年泰定三年六月廿四日卒得年七十九清湘介

湖北窮徼谿蠻峒獠錯居其壤山有毒蛇儲之為蠱以
中人立死而獄多蔓辭君曰戕人以售其妖此宜犬豕
弗食可少貸之乎悉論寘于法撤淫祠魔庵又數十區
取其材瓦葺新學宮曰此教基也庶幾使民知所以教
時方有事交趾全當孔道餽餉所出他官屬或畏難遁
去徵發調送郡獨倚君以辦贛有廢縣龍南居獠中而
以其地隸信豐南安萬戶府蓋僑處其縣官命分卒為
六屯使耕龍南曠土自食其力以備捍禦久之招納亡

命索籥姦私民甚患之而未有以愬也君列上其事請
復置縣從其軍蓋按覆數四而卒無以易君之議焉君
之政大抵皆可紀而狀君之行若徒以士貞之能言者
筆之書則夫士貞言焉而不及者尚多有之雖以予之
知君而不敢溢于辭懼非傳信之義也君之先配黃氏
先君卒今配林氏治家得母道甚子男二長士元梧州
路儒學正早卒次則士貞女二婿曰倪鈿戴樛孫男三
佑僖倫孫女三未行曰夔曰文煥曰德潤君之曾大父

大父父也大父嘗以登仕郎自試入官而未及仕君之
塋其地巖塢距家一里君所自卜天歷元年十一月朔
塋之日也自君病廢卧家以及于死迄今未廿年而鄉
鄰之後生晚輩已無有能言其厯官行業之詳者矣使
更閱數年則君之與存者幾何哉宜士貞求文表著之
意汲汲焉而不敢後也然則古之以功業自見而恃文
以傳者亦若是而已寧獨君哉銘曰

智名勇功所謂達財隨而有獲繫乎時哉昔君用壯直

奮無回乘于艱屯仕道以開轉丞試令績用恢恢駕車
橫陽有沃西來孰挽而行孰軋而推歸承燕休終于耆
台巖塢之丘封樹每每相爾嗣人視崇思隤凡物之生
有覆有培人胡不然自戕其枚吾銘爾貽併泄爾哀

盧氏母碣銘

盧氏母杭州城東人徐姓諱妙安歸里中盧翁翁業坐
肆販繒母常佐之操竒贏聯什一稍稍致饒裕而儉順
之化行于其家穆如也生男女一女適徐永亨男德恒

治岐伯倉公鬼吏區言為疾醫里人詣門求察脈無論
富貧貴賤率與善藥士大夫稱之初德恒兒時行戲市
中得道棄佩刀携白母母變貌切責曰是豈無主物哉
曷不待其還求審而歸之爾未成人已自利如是吾安
望爾怒經日不解德恒自少即知分別義利母教實然
也泰定四年母年七十七疾既瘳語德恒曰汝能盡子
道已惟當盡人道則吾死其無憾又瞑目語諸孫曰勤
讀書勤讀書語未終而逝二月十日也德恒買美楨為

櫬具襲衣為斂治喪制服壹遵禮經踐雨風涉濤江行
求塋域岡阜間兢兢惴恐若或失之如是三年得錢塘
縣定山范村之桐樹塢相墓者曰宜卜兆者曰吉乃以
至順二年十二月庚申奉匱即窆窆之明年將植碣表
墓請予銘而刻之予惟杭故俗家有喪用浮屠老氏之
法建壇塲設齋祠歌唄作樂越月踰時舉匱畀之炎火
拾燼骨投之深淵燕娛娛賓費數鉅萬以此相高漫曰
吾不儉其親矣萬有一能營隙地湖山左右琢雕刻鏤

為墓治隧又不過夸盛強飾觀遊往往草未再宿而已
夷為平陸其悖禮違義日趨于薄于愛親乎何有今德
恒卓然拔流俗推其自盡之心成是因山之禮地不愛
寶龜不祕智是開佳城以封以樹則夫致吾之孝以盡
人之道固足以蔭籍其子若孫矣翁諱華卒先十二年
年六十八其塋徐村距桐樹塢數里而近孫男四浩澄
杏子婆留孫女一德恒字仲庸治生厚交不為市道庶
幾柳子厚所稱長安藥市宋清者予每資其液齊以為

衰莫之防焉乃不辭而與之銘銘曰

生則有養不覲其豐死則有藏不要其隆前林後岡涵和葆冲是盧母阡百世維宗

園一道人墓碣銘

并序

園一道人為老佛之學得其玄微而不滯于名相所謂遊方之外者也道人頽身廣顙疎眉秀髯常所戴履幘冠繩屨而已然其風神曠朗人望之如古仙劍客性嗜遊名山水在數百里間一筇徑造興盡即還居鄉不為

崖異而視世人用計巧取之術疾之甚于狗偷道人世
居建之浦城諸祖以上皆有仕籍于宋族故大也既冠
而遭兵燹間闕離析獨幸與其母能出萬死一生中早
暮調適旨甘節時燠寒曰吾有母在宅無恤焉蓋沒身
孝養彌篤中徙縣東鄉泰寧里耕稼樵漁外託興吟嘯
言皆根理天歷二年其歲己巳春秋七十又二以疾卒
家九月十二日也明年至順元年正月某日塋大嶺下
瀆原合于其配鄧氏之窆初道人無子已而有子其養

子曰鐘嫡子曰鉉女二皆嫁里中人孫男四曾孫男二
道人諱玉成姓李氏自號園一翁又別號翠陽子祖諱
源父諱樸皆業儒道人塋後一年其方外友虛一先生
趙君嗣琪自京師來錢塘為予言道人世業行治如此
請予銘其隧予聞莊周言去智與故故無天灾無物累
無人非無鬼責若園一道人庶其似之矣為銘使刻置
隧上銘曰

以知養恬而遊于玄生不百年樂哉其天

夷門老人杜君行簡墓碣銘

并序

至元大德間儒生學士蒐講藝文紹隆製作禮樂之事
蓋彬彬乎太平極盛之觀矣然北汴南杭皆宋故都黎
獻耆長往往猶在有能參稽互訂交證所聞則起絕鑒
于敗縑殘楮之中寄至音于清琴雅瑟之外雖道山藏
室奉常禮寺亦將資之以為飾治之黼黻若予所識張
君君錫杜君行簡則以汴人而皆客杭最久于時梁集
賢貢父高尚書彥敬鮮于都曹伯幾趙承旨子昂喬饒

州仲山鄧侍講善之尤鑒古有清裁君每上下其論議
而諸公亦交相引重焉延祐初朝廷首起君錫為大樂
署丞將次及行簡而君錫死又數年行簡亦死士論盡
然歎詩樂之不復振矣行簡杜氏諱敬其字行簡世居
汴城中祖亨嘗有官勲父民鑑卒湖南道宣慰副使行
簡自幼器識凝邃不與凡兒徵逐為嬉戲事稍長學成
研窮律本分別音節悲憂愉快概發于琴晴朝月夕人
境俱勝觴詠方適促絃鼓一再行巖溜清而晚蘭潔也

學其學者其抑按吟揉皆有指法可傳行簡善書蓄古
名人墨迹歷代金石刻甚富然為好事者持去亦無係
吝性嗜酒客至傾壺倒榼盡醉益歡行簡少嘗以禮部
令史從尚書柴公奉使安南還辟廣西帥府掾江淮行
省又嘗署人匠提舉司都目江陰榷辦官皆以不屑意
未移時棄去大冠長裙優游湖山文酒間晚自稱夷門
老人得年七十而終泰定元年十二月二十二日也其
配李氏里中大姓女婦德母儀既順而恭卒後八年年

若干子男二士元士謙也士元南臺察院書吏士謙浙東廉訪司書吏皆以儒貢孫男五孫女二俱幼士元士謙將自杭舟載其二匱歸卜汴南二家店之塋以泰定四年某月某日就窆先事以狀請于東陽柳氏曰吾翁早從南北賢大夫士遊竊常有考于藝文之事時非不偶而身不一試不肖孤行能之未著名譽之未立也即塋而無刻辭于隧其何以昭示來裔子幸哀而予之銘焉昔子與哭君錫京師有誄今行簡以禮塋銘烏乎辭

銘曰

道和德順溢于聲雅南一濫琴孤鳴徽以白玉絃朱繩
五音二少濁變清杜氏于琴若天成使和其音薦神明
豈不為世躋隆平江湖遙夜占隕星鑒亡絃絕秋風驚
夷山萬里開佳城魂兮歸來其永寧

元故太中大夫海道都漕運萬戶周公墓誌銘

并

序

海道都漕運萬戶周公以元統元年十二月七日卒官

明年正月十有七日自吳郡買舟載其匱北還還用四月十三日塋所居鄉張寺里先塋之次其配汝南郡夫人王氏戒其子宗袁經泣拜請銘昔予漫仕與公同朝及考鄉進士試上京公為留守判官迨今西遊而公持漕節于吳每見益歡辱與之遊蓋餘二十年銘非予誰宜為公諱仲字信父衛之汲縣人曾祖諱祚金忠勇校尉步軍將官祖諱泉以公貴贈亞中大夫衛輝路總管輕車都尉追封汝南郡侯父諱麟累贈嘉議大夫禮部

尚書上輕車都尉追封汝南郡侯公少警敏稍壯得推
擇為山南淮西二道廉訪書吏貢補吏部令史由樞密
院掾為中書左司掾攷成擢兵部主事建德路總管府
推官崇祥院都事工部主事中書省檢校官進工部員
外郎稍遷上都留守司判官兼本路都總管府判官兼
推官出為河南江北等處行中書省理問官揚州路總
管改漕運萬戶歷十官皆不俟終更而惟建德推官未
嘗上階自承務郎七遷而至太中大夫食正三品祿終

其身公以文吏自奮于刀筆間挾通敏之資而達之于
用應事制變他人首鼠不決公徐出片言裁其過甚而
彌縫其缺失無不動合樞機揚州之政不隨不激人尤
樂稱道之與人交悃悃無華久而彌親故其死聞者盡
傷得年七十元配王氏先卒封汝南郡夫人男宗後配
王夫人出也女長適王某次適郭某次未行銘曰

粵有才焉際可而仕不屈于時亦敏于試爵為通侯可
謂既貴未及縣車終于其位歸從先人丘首之義陵谷

有遷吾銘斯眎

無為子碣銘

無為子少時遊方之內應物而不滯於物人謂其一代
豪俊人也中歲去而遊方之外葆真而全其真形化而
神不化雖列仙山澤之臞要不是過何其異哉無為子
故儒家姓張氏諱悌字信甫居鄞之象山有別業在鄞
城扁舟往來傲兀烟浪自視為鷗夷子皮然好結賓客
重交遊肴觴左右具捐所有予人無吝色父嘗以戶門

微罪當逮詣吏無為子奮前請繫曰父老願以身代雖
萬罪不敢辭父藉以免奉親能備孝養而身與妻子衣
簞食糲而已象山中大瀛海陶隱居司馬鍊師之遺跡
往往而在無為子早從方士習聞道家長生久視之說
心竊識之既壯出遊南粵北燕回薄萬里獨愛武當神
明之奧巖巒峭森溪谷靚窈鍊形伏氣莫此為宜歸對
妻子常語及之而妻子固不信也一日大會親戚故舊
曰吾當去隱武當矣親戚故舊爭勸止之佯應曰諾詰

旦引刀截髮解故衣被布衲偪屨著行滕佩鉢囊掉臂
出門徑去顧語其冢子古初爾善事爾母教育諸弟爾
無以我繫其心也行涉重江至武當山依止紫霄宮師
事其宮主張真人願執弟子役真人亮其確誠啟之道
要授職首衆無為子晝則服勞薪水間與衆同苦甘滋
味取其至薄者夜則危坐一榻脇不至席如是三年忽
晨起別衆衆方恠之則既化矣泰定四年四月二十日
也得年四十八化三日道衆產之紫霄峰下訃至家家

人服喪如禮古初重違先志不敢迎其匱歸因不如葷
血必期至山中樹碣以表其藏乃絕海來吳泣拜請辭
昔予客鄞識無為子衆人中知其健敏可託以事而不
知其能離智絕俗究竟生死偉特若是豈出世間法亦
必世之勇者而後能決致之與無為子始娶許氏子男
四曰古初曰謙曰弘曰惠女三其二已有歸其一夭銘
曰

生之謂寄而亡非其棄不亡者存是謂知生之類無為

而為以貽之來世

劉彥明墓誌銘

并序

彥明諱德智字彥明姓劉氏世家于歙曾祖諱元佐祖諱儒望父諱震皆隱德不仕鄉里稱善人焉初彥明之父以張為後於劉生彥明四歲卒而張氏父固在實為之經紀家事教育彥明至于成人張五子其一天而其家素裕彥明尤大父所深愛將使還後天者彥明泣對曰劉氏無子故以吾父後今既歿于劉氏明其為劉矣

德智以一身繫劉氏之宗誠不敢重獲罪于吾父與劉氏矣大父感其言而止彥明少知自厲于學好讀孫吳兵法旁究釋老方伎之書嘗因是感疾已乃大悟求之四書浩有所得久而下筆為文覺其來源源纚纚遂得由庠序選為建德路儒學正會教授闕進攝其事守郡者諷使文致直學之罪彥明不為動俟間復為辨說考滿入教授銓翰林院方薦為其屬而彥明翻然歸矣尋授永順等處軍民安撫司儒學教授未上中書刑部辟

為其部令史官有齋怒于同列而將黜之彥明曰無厭將及我投筆謝去于是都水監復羅而致之稍進壽福院掾壽福出納五臺諸寺錢糧其田入隸浙西數郡比歲浙西被水有司按實當檢放而院猶責償未已彥明適從其判官出行江南視其牘歎曰官民糧已罷征吾院田能獨無傷乎悉命施之諸使怒其專擅而卒亦無能奪其議者嘉興有豪民誣占寺田三百畝左證甚明而院所遣使賕賂莫能決及彥明來請鬻路絕乃卒歸

其田考成得將仕佐郎衢州路常山縣主簿滿歲江西
省有知其為者辟為掾新執政至杖一掾而掾實無罪
彥明竟歸曰吾唯不能隨俗俯仰以至于是可再辱耶
進將仕郎為平江路總管府知事平江劇部案牘叢脞
彥明處之以無倦取其犯名義者一二事稍釐正之不
激于奇不毀于隨暇則却騎入閭巷訪求耆舊啜茗縱
談猶書生故態也閱再歲卒官下得年五十五天歷二
年七月十四日也談者例訾儒生為政迂濶于事情而

不知聖人之法制具于經儒能據經議法故達權而知
變彼隨時重輕觀勢向背以竊取通人之名者豈所謂
政哉彥明得於所學歷試內外階是以無失身敗名則
亦未為無所見乎世也彥明之配李氏姑女先卒子男
二煒煜女二長適徐梅次在室卜地得建德之淳安縣
開化鄉駝馬原距家餘百里將以某年某月某日寔先
事其子煜具書世出爵年為狀介京兆杜原父乞予銘
其言曰葬而不得銘猶無葬也予嘗識彥明京師知其

為人而杜君又不輕于許予是可銘已彥明始字千里
謂其取義之未廣也易以今字晚又號知非予其詩文
曰紫溪集鄉先生方公回為序而藏之于家家有仁本
堂鄉相程公元鳳為大書揭之而陵陽牟公巖記之彥
明之祖程公甥也所謂仁本者彥明固服而行之矣銘
曰

守經為分制變為通通故能介承之自躬彥明本仁由
學以克及試于事事為之中考其成績粵有始終天不

畀年歸于堂封有德有言遺後者豐尚有千年安此幽宮

于思容墓誌銘

邗為姬姓之國後迺去邑而氏漢廷尉定國族望東海子孫或即居或稍徙支繁庶衍尚為盛德之世朝列大夫益都般陽等處田賦總管于君思容之先亦自東海徙文登譜足徵也初金季李全據山東以叛其弟二太尉畧地至文登君之祖諱祥隱里中方坐塾教諸生兵

暴入為所掠見其儀狀偉岸挾刃臨之偪與俱行至益都稍即問計則亂以他語答之若闇於事機者然當其濫殺亦強諫止之所全活甚多全受擒其妻楊舉衆歸朝開行省山東因得署為其從事未久棄去娶臨朐蘇氏而家臨朐生君之父諱世傑讀書知學性高潔不與俗溷中年自放于酒聞宋平浩然南遊擊節自誓曰自晉失其御衣冠播遷中華禮樂萃于南土予將觀善于是而且以淑吾之子孫焉因僑家吳中三十年年七十

四無疾卒是生思容思容諱欽少學于吳持其苦力自
進弗懈宿儒老生皆折節與交集賢大學士郭公貫浙
省平章高公昉尤深知之方以才辟為淮西廉訪使者
書吏未數月而國子助教之命下矣游擢山東廉訪司
照磨在官三年再以國子助教起君會君服母喪喪除
以為翰林國史院編修官辟御史臺掾進御史臺照磨
官拜南臺御史未行詹事院奏為其院長史就拜監察
御史遷中書左司都事又遷詹事院經歷中書左司員

外郎御史臺都事太禧院奏除其屬壽福總管府同知
中書省復以為兵部侍郎方出試田賦府到官未踰月
卒官下得年五十至順四年七月十又八日卒之日也
君器資宏達而文法敏明官山東時屬歲大饑嘗行縣
至濱棣濱棣傍海民尤艱窘君為之發廩勸分計口以
舖之禁防周密民實受惠而免于死徙泰定初元姦黨
未盡誅君為書數百言極陳逆順從違之故請早正其
罪所繫者皆顯臣要官聞者為之縮頸在左司叅決機

務在臺端振肅風紀辭皆據經守律不務刻深而忌者
往往因其銳進構為誣語以讒沮之其出為總管也亦
藉是進秩之名而陰以抑退之耳雖不幸遂至大故然
使人有不盡用之嗟則君未為無所見于時而死也昔
君之父死吳中蔽其匿于吳自曾祖妣祖妣及其母高
氏六喪皆在淺土君解山東照磨持母喪時始卜地于
益都城南十里望城阜之原而序塋焉今君之子將奉
君祔其兆次乃為書具其世出厯官行治請某識諸其

幽某嘗辱與君友其再為助教某實薦起之洎某補外而君始顯用未及十年已有幽明之間銘固不可以不之予也君之父以君貴贈至中順大夫禮部侍郎上騎都尉追封河內郡伯妣高氏周氏並封河內郡君而君周氏出也君娶金氏亦封河內郡君子男二曰潛曰溥女三其二已行其一尚幼君官京師嘗題其齋曰壘空而記之其所自得可知已銘曰

學焉而仕行其所知我安以徐彼競於馳方其欲翕有

或張之謂天匪私亦毀于隨貴而不年則將尤誰有子
承家貽爾慶基不朽者存豫此銘詩

元故武畧將軍鄧州新軍萬戶府管軍下千戶贈

武義將軍飛騎尉追封靜安縣男靳公墓碑銘

并序

自靳氏得姓而其事畧見于楚漢之策書至近世升名
宦牒始班班有人而楚產固無聞焉何其土風之特異
也武畧將軍鄧州新軍萬戶府管軍下千戶贈武義將
軍飛騎尉追封靜安縣男靳公世家河內其父轉徙兵

間行次真定之深州靜安縣縣人劉氏妻以息女遂依之以居生子男七長即公壬辰歲河南北始伍民為軍而劉氏在籍中公以彌甥當行隸史都督麾下屯樊城攻襄陽渡漢沔實能以材勇自効阿珠元帥見而奇之拔為帳前至元三年從破劉義受賞統鈔五十貫五年領衆修白河因與萬戶楊珠濟達蕩平大洪山黃仙洞諸險隘計功班賞有差九年下樊襄公以先登再被釀賞及破沙洋新城進受省檄為管軍百戶十二年二月

追敗宋殿帥孫虎臣奪其所乘舟丞相巴延忠武王壯
之手取白金百兩寶刀一具以賜十一月常州城破錄
其功真授管軍百戶階忠顯校尉十三年三月江南平
丞相奏凱還朝公從入覲例錫襲衣鞍轡又賜統鈔五
百貫丞相若曰斬某爵不酬功吾將有以厚之其署管
軍千戶兼西峽渡提舉四月命下得佩銀符進階承信
校尉時越閩山區海聚間民相挺為亂諜報交午行省每
有調度必命公以全師備左右拒若沙縣之廖平章漳

州之陳弔眼建寧之黃華皆其壽張桀黠者也公出其
伐叛招攜之謀動必制勝其入建寧手刺渠帥黃朝奉
王拔都而生獲其將陳統制獻之行省又降其大校黃
叅謀劉發陳士良等數十人省臣方飲至舉白金碗二
旌其勞烈就命撫安羅源寧德長溪諸縣為之署官置
吏民得樂生興事如初至是朝命始用丞相之薦授公
武畧將軍鄧州翼管軍下千戶重功次也廿一年復從
孟固台右丞入朝右丞為言功狀上嘉賞不置賚以襲

衣弓矢鞍轡且重錫金符就升管軍中千戶未上樞密院申定兵制復改下千戶九年公年六十四請于萬戶府曰昔吾早從征討行冒矢石身被瘡瘍壯強襲虛羸老成痼願得放歸田里以終莫齒而令男檜繼職禦戎府上其事報下如章公即日駕輕車北歸徜徉雞豚社酒間甫閱四歲遂卒時則某年某月某日也得壽若干塋某縣某原祔以其配某氏公軀幹頑碩力能挽強命中奮身戎行積勲受爵而尤為巴延忠武王阿珠武宣

王所知平居輕財重義禮賢下士恂恂固儒者也初越
閩之叛諸軍爭致生口公得男女老弱總若干人會中
秋家宴公厚飲食之且戒曰爾不幸麗於叛黨今首惡
服誅亦良民耳誠能召其所親來吾將悉縱遣爾已乃
間有來者因令自相保任散還鄉里明年及期所縱男
女扶携來謝且大作齋祠祈以福報有陳生某嘗業儒
亦在俘中公亟命之冠帶使教二子以學又為請諸當
路官之庠校間世言武將出世慄銳乘時致功業犯道

家所忌而不知以仁勝不仁固若時雨之澤物而非以
為物之厲也蓋觀于靳氏之世而可信矣公諱忠其父
諱用則始家靜安者也初室張氏生櫓忠顯校尉鄧州
新軍萬戶府下千戶女適張某繼室余氏生汝舟奉訓
大夫江浙等處行中書省檢校官汝霖早世女適王克
茂孫男二贊今襲為千戶鎮守黃蘄贊方從學孫女一
適李某泰定初有詔推恩内外文武臣工用其爵秩追
榮考妣至于三世乃贈公武義將軍鄧州新軍萬戶府

管軍下千戶飛騎尉追封靜安縣男張氏余氏並封靜
安縣君汝舟強學敏用詳于議法方為時所不舍是能
大其門者比歲官杭某嘗與之遊焉顧謂某曰吾父起
行伍有官勲而質直無華嗜善好義施及于我子孫尚
竊祿食以不墜其宗使無文字鏡之隧石以昭德訓嗣
其謂斯何敢再拜請辭某曰孝子仁人之志某其可重
違之乃撫其事狀序次如右又繫之銘銘曰

在至元初元運動興輯其武功四方次平大將小校各

揚其英發必有中敵來無勅若時雨降庶物憑生劉甥
靳氏擐甲從征自拔行間以善戰名賈勇濟漢先登蹴
荆計功受賞百金為輕雖長千夫寵祿未贏曰吾忠哉
惟所指令山魃海蜃汝干大刑首惡既殲庶孽為清夷
凶獲醜載世永寧吾老有子願服踐更庶幾畢景仰首
皇明公今已矣墓栢青青介子材良列官外廷爵以疇
庸猶序而升紫綬金魚卹典宜膺漏泉之澤赫矣明靈
本武經文沒有餘榮有子而令卒大其成閭左徵兵丁

壯于行河朔之間塵無遺氓彼薦草莽此襲冠纓公在
帥中惟其血誠老氏若曰累善如登爾子爾孫世篤忠
貞文于冢石以鴻厥聲

馬仲珍墓誌銘

并序

睦州詩在唐中季有章協律方處士李建州在宋渡江
後有高師魯滕元秀皆清峻簡遠各自名家仲珍襲其
芳華沐其膏潤問詩法于耆老成人盡得肯綮措意遣
辭初猶稍尚葩澤晚更脫畧邊幅直窺微妙往往年自

為卷而製名述序要有深意統曰歲遷凡四十卷溢之
為銘贊記序雜古賦又十有二卷亦各自名編蓋其學
本之經驗之人事而槩發之于言故能致多如是然反
而求之見其約不見其博嗚呼仲珍死矣詩當得傳如
前數公無疑爵位功業孰久孰近何足計哉仲珍姓馬
氏諱瑩其字仲珍世家建德縣之新亭鄉族故大也乾
道淳熙間有與徽文公仕學相上下官至禮部尚書諱
大同者於仲珍為七世叔祖矣曾祖諱治鳳祖諱之友

父諱維桂皆蓄德不試母濮氏亦里中望宗仲珍少而
穎發長益潛深精研經史旁連諸子百家下逮山經地
志諳俗方言朝披夕攬寒華濟英中雖釀郁而外實夷
澹鄉鄰子弟來學往教就其矩度莫不卓見端緒一時
名人勝士景向聲求郵詩願交爭取力挽延祐科興議
者品量人材咸謂仲珍有以自効而有司苟知仲珍亦
咸望其出奇一勝以售其明始用春秋舉上不利後更
用禮記亦不利人意仲珍怠矣方益厲氣賈勇為其文

不少輟久之彙次所著五經大義四書答疑及自問自
答策合若干篇題曰因天集而其志孤矣仲珍嘗倣漢
魏樂府辭唐柳柳州新體製皇元饒歌鼓吹曲十有二
章將橐之走京師異塵乙夜之覽而未及脫橐又嘗手
選唐五百家詩五卷宋南渡諸家詩一卷別有講義讀
書記各二卷藏于家其學橫騖捷出如車適御矢破的
也仲珍娶翁氏生子男二曰鈞曰鉉孫男一仲珍病時
始生命其名瀚仲珍生至元庚辰卒元統甲戌得年五

十五閒居喜自修飾或佳客時至情景俱勝促觴命醕
取琴鼓一再行自吹洞簫倚歌和之一毫不以貧窶累
其心自署號雪夢居士天趣自得可涯涘哉元統元年
予客吳下臘將盡仲珍扁舟歛門語夜參半請曰夫子
知我文莫為有司為則有以振我度歲別歸神色揚揚
予方張之期其晚達是冬予東遷次睦則聞仲珍十一
月十五日以疾卒家先一日力疾語予曰我死必求
柳先生銘不得銘則無以塋釣既卜藏域馮塢祖塋之

次惟食將以明年某月某甲子寔乃具行治為狀衰經
踵吾廬泣拜道遺命請辭嗚呼予尚忍不銘吾友也耶
銘曰

孰昌其詩不售于藝亦嗇其年而卒殄瘁得深行遠要
以永世吾銘斯阡質之無媿

元故奉政大夫僉領北湖南道肅政廉訪司事崔

公墓碑銘

并序

從仕郎河南江北等處行中書省理問所知事崔敏數

千里貽書諭貫曰敏之大墓在神山自曾祖仕衛再世
塋昨城昨城濱古河道河雖別流而漂砂擁礫冒沒人
廬舍冢墓勢如潮汐不可遏止比歲先人卒官湖南還
卜兆域得大梁開封牆堡里小邊村維食因奉遷二祖
之靈而以先人序塋其次今十又七年矣隧間之石未
有刻辭惟先人之友獨先生在先生嘗司謀于奉常其
言信能昭德表行敢具列官世行治壽年卒塋終始為
狀而以銘累先生貫應曰而父雅知予文銘予職也乃

序而銘焉序曰崔氏出姜姓齊丁公伋之子食采于崔
遂因以氏世遠宗滋僑居占徙代序莫詳金正大間有
諱世英者始自惠州神山縣以軍帥從戰北口蹈難死
弟諱德茂襲其職會天兵南下遂以全師効順得授左
副元帥領所部鎮神山後以城變遇害元帥之子諱義
隸吏開府幕下有善文法聲累遷輝州安撫使兼屯田
提領即居胙城以塋者也湖南公諱良承字仲欽少靜
密有為讀書知大義薄遊錢塘以材譖自致江淮行省

署為理問所令史進浙東宣慰司令史上官善其幹敏
每出專征伐行幹財計必擇公以從公亦樂為之輸誠
贊理考滿授將仕佐郎兩浙都轉運鹽使司知事尋辟
江浙行省掾稍遷從仕郎袁州路分宜縣丞未上辟宮
師府掾超授承事郎江浙省理問所知事時執政方病
二浙鹽法之弊而莫究其竅卻乃出公循行諸場推見
隱訕而因以時弛置之法既不煩賦亦易贏治辦而還
衆益才之既代選補中書左曹掾明年擢戶部主事階

承直郎勾校簿書綜覈出入勞績彌顯又明年陞奉訓
大夫中書左司都事遷奉議大夫宗正府左右司郎中
御史臺復奏以為監察御史出按事山東未還選授奉
政大夫僉嶺北湖南道肅政廉訪司事在官七閱月分
按衡全永寶慶武岡五路蒞治精嚴訊獄詳允雖受劾
被黜罰而人不以為苛道病還卒潭州治所至治元年
六月十又六日也得年六十一娶王氏特封胙城縣君
子一敏也嘗以國子生從貫學治經介然有立女二長

適中順大夫漢陽知府兼管內勸農事盧恂次適承事
郎太常禮儀院郊祀署丞續欽祖孫男四性學志學禮
學嗣學孫女一未行塋以卒之明年春三月某甲子曾
祖左副元帥府君祖安撫府君父諱慶河南河北等處
絲銀人匠提領始又徙大梁為大梁人以公貴贈奉訓
大夫禮部郎中飛騎尉胙城縣男母蕭夫人追封胙城
縣君邊村之塋安撫居北之中禮部居左皆以其配祔
公平居恂恂安言徐視未嘗以氣加人而其中所自信

剛果亮直不為回撓故于吏治能執嘗御變機張鍵閉
于情無不盡而于法無所損益五辟掾六遷官皆典章
法令之攸司識其統體持其綱要于薄物細故豁如也
方出節觀風奄至大故識者惜不盡用而為世道人才
計者至今猶有憾焉公自戶部左司暨登六察與貫並
居京師遊好最稔而知公制行之詳以能載之于銘亦
莫宜于貫貫茲銘公是以無讓銘曰

繫齊庶姓有食于崔別氏承宗燕及雲來基德之厚若

種而培維忠維孝則罔後苗自公始奮允藝而才木則
有松馬則有駉揚中踐外其立不回憲物容典式時討
裁烝烝成乂暨暨達財天固予之又軋而摧其摧曷以
不至考台翼子貽孫既條既枚非承孰引非用無恢牆
堡之虛雙表崔嵬琢此銘詩尚有徵哉

故宋宣教郎主管禮兵部架閣文字林公墓碑銘

并序

諸姬之庶姓有以字為林氏者子孫世仕于魯之季氏

而放為孔門弟子元和姓纂謂比干有子逃之長林遂以繫氏夾淦通志辨其非矣自周而降厯千有餘年族散宗遷邈不可考而南粵東甌相繼特起以科目宦學相高洽于季宋東甌尤盛雖同州黨然各自為譜緒系不明蓋非一日之積也東甌別譜有居于永嘉華蓋鄉黃石山下者自宋武經大夫知柳州軍州事諱纘孫始顯而公其嗣子擢景定壬戌丙科賜同進士出身調常州司戶參軍再調福州觀察推官未上廣西經畧安撫

使辟為梧州軍事判官留佐幕府尋除主管禮兵部架
閣文字用薦改京秩階宣教郎遷樞密院編修官以養
親辭不拜方遭內艱而宋既改物遂得高蹈遠引全其
不仕之節而著其歸潔之義天固厚幸之矣公諱璫字
壽玉一字叔玉曾祖諱師正宋將仕郎祖諱武受業紫
陽文公之門人服膺中庸尚絅之訓以碩儒望里中用
特科入官滿河池尉退而講學於家卒以柳州恩贈朝
散郎父柳州治孫吳尉繚子司馬法登武舉進士第由

普州徙柳州其家始因之以大者也公初任常州州庾儲粟餘萬斛歲久將腐公白郡請新陳均給粟得不耗守服其能嘗受檄慮囚囚有具獄當其衆死者吏抱成案前請公占署公閱牘疑未究一問得其誣服之情平反上之囚以不死又嘗攝宜興無錫二邑皆先教後禁治之以靜其最知公而薦之于朝者魏公克思趙公與植孫公嘉趙公與積常公楸陳公昉林公洽陳公懋欽也凡是數公皆名卿賢大夫其所稱可非苟然者始孫

公將特薦公公辭以資淺宜先元僚孫公義之立為改
奏而次亦遂及於公時公纔三十餘耳使其老智慮于
更嘗究猷為於克闡其至詎可量哉公自少抱負不碌
碌要有所試于時中罹艱棘斂其鋒鏑益磨礪淬厲于
學以故卒就平實其居鄉處族嫻有惠利可以及人雖
嗇已弗顧也季弟繼諸葛氏無子死公割已產擇于其
黨立後承宗舉內外族貧不能舉之喪無一毫係吝曰
此吾孔氏家法也端居二十年寄情吟咏自號蓋峯散

人元貞丙申得年五十八以其春三月十日示微疾命
舉扶起坐正冠襟而卒此豈無得者哉公娶諸葛氏先
卒子男二長曰堅次曰堂女一適將仕郎曾怡老孫
男二鈐錫曾孫男二淮浩自初喪菽匱于建牙鄉郭溪
黃岡柳州墓下今卜得襲吉將遷窆于膺符鄉信墓之
原于時堂為處州路儒學教授以其友鄉貢進士章仕
堯所次事狀千里具書致幣請銘其窆而予友溫台等
處海運千戶趙君大納比宰永嘉常以事過公里下瞻

喬木之陰歎人門之美談次每為予言之固已悉夫林氏之世矣尚何諛墓之嫌哉嗟乎亳社為墟而郛鼎致賂吾不為殷臣之逋播而為殷士之裸將不為澤畔之憔悴而為遠遊之娛戲公之素志蓋不然也然而所積者厚所養者深谷駒自繫而纁帛弗加因得以葆勝舍之潔遂元亮之高沒餘二紀而子孫之敷菑益敏詩書之銍艾愈豐銘以昭德不鄙屬筆於予予烏乎辭銘曰顯允林宗世服于禮公纂其華繩繩其美方序而外胡

遜于肥鳳翽鷁退繫乎其時藝仁仁熟艱則致裕未耄而嗟何奪之遽殄殷百年壽考無遺祭于社主過者垂涕膺符之鄉啟茲封域有饒銘章用訓無斁

元故戴孺人劉氏墓銘


并序

里中戴暄景和之內子劉氏越諸暨人生二十一年歸暄歸三十八年相暄治生理家事舅姑字兒穉和宗黨甚得婦道以至元四年其歲戊寅秋七月三日卒家年五十九卒後三月卜塋金竹塢其日九月癸酉也劉氏

諱錦父曰天麒母曰王子男二堯良子女一適趙仁本
孫男三恭溫安女一俱幼比歲良以父命來從學予治
經今年春月泉書院任為直學試肅政府歸而母病聘
醫致禱無所不至閱四月遂以不起于是暄失良配哀
不勝情將塋復遣良哀經歛門乞辭鐫石乃為之辭曰
婦則母儀觀于而家方邇而悴有戚其嗟維以昭之銘
則非夸

待制集卷十一

謹案二十六頁前四行阿珠舊作阿朮今改後做
此 二十六頁前六行揚珠濟達舊作燕只吉
歹今改 二十六頁後一行巴延舊作伯顏今
改後做此 二十七頁前八行孟固台舊作忙
古台今改



總校官庶吉士臣張能照
校對官編修臣楊壽楠
謄錄監生臣潘奕基

欽定四庫全書會要

集部

待制集卷十二

三

臣董誥詳校

詳校官助教臣謝登雋



欽定四庫全書薈要卷一萬六千四百四十三

集部

待制集卷十二

元 柳貫 撰

墓誌銘

故宋孫明府碣銘

至元十三年八月王師渡錢塘下浙東所在繹騷通直
郎知臨海縣事四明孫君奉其母黃夫人在官以養及
久將代命家人御之先歸以避其鋒既受代即辭還次

柵墟逢鄉人言夫人復往臨海且數日君倉皇追奔及之而大兵已薄城下則與一力躬負板輿窮日兼行冀將先入未至遇兵母子遂俱蹈難死十二月二十五日也一力脫身以其計馳告家明年二月某甲子奉衣冠祔鄆縣環村吳墓先塋之次夫人得年若干而君纔四十耳君以父蔭入官初調潭州司戶叅軍轉建昌軍紹興府錄事叅軍舉員及格改宣教郎宰臨海稍進通直郎三試郡曹一領劇縣錚錚有能聲舉君陞陟者葉公

夢鼎王公應麟湯公漢翁公合而葉公尤深知君謂其
少年能自植立奉母尤盡孝養要為有所見而云也黃
夫人於君嚴而有恩公退莫歸必詰其所理之政苟至
平允則喜溢顏開一或未然深加責譙曰我見爾父決
事多當否乃易知耳君之先事慮患將以置母於安全
母之不舍其子復將相依以生是皆骨肉之深愛母子
不能自己之至情而亦豈料夫禍釁之起乃常出於智
巧之外然則自盡吾孝自盡吾誠雖死猶生尚何歟哉

君諱璫字壽朋孫氏系出河朔九世祖全照有功澶州
當補牙校以讓其季而南遊吳越占籍於鄆之甬東乃
為鄆人是生宗顯宗顯生忠忠生周周生義端義端生
諤諤生允諤布衣領旁縣昌國權酤而卒喪在殯權所
火起烈焰次及之允伏柩上呼號哭踊繼之以血尸滿
廬落皆燬獨敢塗筵几儼存一邑震異允於君為曾祖
特授承務致仕承務生枝與其子起予同登嘉定七年
進士第於君為祖以迪功郎監潭州南嶽廟累贈朝散

大夫南嶽二子起予願質願質君父仕至朝散大夫工部侍郎南嶽早從宣獻樓公端憲沈公正獻袁公游及見徽國文公而證其所受邃學雄文望於一時嘉定更化嘗詣公車拜疏極言天下大計不見省罷歸慨然欲用其學所著書曰海上藁藏於家孫氏八世二百年善植而益滋孝鍾而屢顯積誠累德天實臨之人實信之然能致祝融回祿之潛燹息燼而不能使斧塘鋒蝟之回面革心豈天道無知有時或然而其可恃者則未昧

也君娶莊氏子男一嗣明將仕郎死亦三十年孫男三元厚元佐元蒙曾孫男十有一重紀至元五年其歲己卯距君葬六十三年矣貫游鄆還次餘姚元蒙客授是州道君死事悵悵不勝哀恫若欲祈貫為辭以泄其湮鬱之思而重於言焉又明年至正之元貫蒙恩召還禁林元蒙乃以其狀并錄三世幽堂之誌寓書拳拳申前請貫悲君之邁難罹凶者如彼而喜其嗣慶紹聞者如此則為序而銘之銘曰

生孰爵之死孰搏之母子天性孰構虐之母實有子子
實有社幸生遘死駢首膏野維孝維慈有不亡者爾世
工儒蓄盛涵深將騰將翔鍛羽而沈有令子孫思廣德
音不昧維神尚赫其臨

瀏陽州學教授張君繼之墓誌銘

繼之姓張氏諱繼祖字繼之世居婺之金華為金華人
張氏出軒轅之後軒轅氏五子其一為弓正以其業氏
唐有龜齡始居金華後乃去隱東海上龜齡即志和自

稱玄真子烟波釣徒者也至今縣多張氏尚皆稱龜齡之裔然代遠宗湮莫可考矣曾大父諱宗義大父諱大能父諱景巖三世皆隱約田間力田以自封殖而其家浸裕則始於大父繼之早孤大父知為令器特愛異之使從學城中而繼之亦克自奮厲課誦讀晨夜不輟天未曙挾冊映簷光而諷繹之夜分燈屢涸猶吾伊未絕養其氣以克其所學克其學以必見於行其志皦如也延祐間郡上其才行得署饒州雙溪書院山長考第成

遂調瀏陽州學教授至則究心學政復其侵田為之圖
其廣狹之形稽其步畝之實刻石學宮以防姦制弊會
守貳闕大府檄繼之攝承郡事時歲薦侵道殣相枕藉
方下令勸分賑饑繼之為設方畧使持券左入受粟右
出區畫既定衆無壅閼竟事帖帖無譁二年以大父喪
棄歸視封窆道遠予告滿百日以例免重紀至元五年
再至湖南還將赴調京師未行而卒五年己卯十月廿
三日也繼之沈毅質敏言論忼慷要為發必有合於義

少讀史至魯仲連傳見為人排患釋難解紛亂而無取

闕

曰士當如是而已其於嗜善疾惡如口之於

闕

也大德中縣有桀黠吏酗虐於民民皆恒怯

莫敢觸其鋒者繼之疏其姦狀訴之部使者詞直理順
卒寘吏以法而繼之亦無幾微見於顏面繼之之有蘊
於中者百不一試而遂死矣使其再轉得百里之地以
少伸其志其所樹立有足觀哉繼之生至元丁亥得壽
五十二娶唐氏子男三道慶道生道友孫男三塤填坦

孫女一尚幼葬得吉卜於資善里天山之麓將以至正
元年十月辛卯窆道生以潛溪宋濂所次狀來泣拜請
銘予惜繼之有致用之材而不幸湮鬱弗獲自致其用
乃為序而銘之以慰繼之於土中而且以塞道生之哀
思焉銘曰

玄真自放于畋于漁以游乎玄樂道著書長山之陽有
植其間世德綿綿不淪以胥繼之強學發聞于儒耕不
逢年豈繫菑畲有子而令尚食其腴載德維辭刻在幽

墟

元故將仕郎婺州路義烏縣主簿贈亞中大夫東
平路總管輕車都尉追封清河郡侯張公墓碑銘
有序

南宮張氏其先蓋安平人金季嘗徙宣德又徙南宮南
宮為真定府所統縣考張氏塋在其縣將相西鄉北杜
村將仕郎婺州路義烏縣主簿府君祔第三域府君卒
葬二十五年而其子國維自吏部侍郎出守濟寧升秩

三品贈府君至東平路總管階亞中大夫勲輕車都尉

爵清河郡侯國維服承休寵循念先德將鑽石揭辭以

貽世訓嗣乃使來請文則為序而銘之序曰府君諱演

字某幼知力學長以文法無害推擇為其府掾宗平大

選州縣官屬燕南按察使適以府君名上初試潭州湘

陰縣丞改江西榷茶都轉運使司知事行御史臺察廉

舉其績遷山南湖北道提刑按察司知事在官以病免

廉訪使者復狀府君遺逸上之調瑞州瑞昌縣主簿兼

尉秩滿真主建康溧陽溧陽升州移義烏府君時年七十又一國維由中書東曹掾擢江浙行省左右司都事嘗以事如溫州謁告來拜府君捧觴上壽意愉愉如也期以冬還奉府君就養錢塘未及期而旋笑語益懽曰吾僕爾久矣是夕疾作因畱侍醫藥踰兼旬而卒即載其柩與北歸又四年始得視窆卒以大德五年十月廿一日窆以九年某月某日府君在江西值中更茶法或謂宜倍賦府君獨言江南新定多取以自利不若薄征

以利人議者多是府君法得不改在瑞昌完葺廨署興
起學舍作大役而力田之農見其楹桷之煥美而不見
徵發之及已比境有疑獄當讞輒移府君就鞠皆鉤得
其情而論法常務平允在漂陽歲部糧時大侵貧民實
不能具春藁出俸錢市粟代入其輸來義烏未久民知
其善人長者喪行巷哭皆哀盡府君外柔和而中健敏
居家治官細行必飭方是時同府舊寮多列顯要府君
能一抑首降氣則美爵豐祿可指取也然養完守固坎

塋終身而蓄其贏餘卒受榮名之報其必於天者何若是信哉府君之父諱德林贈中順大夫中山府知府上騎都尉追封清河郡伯母石氏清河郡君府君之配清河郡夫人白氏先卒子男二國綱管領真定打捕民匠總管國維亞中大夫濟寧路總管兼管內勸農事兼本路諸軍鄂勒繼配苗氏無子卒林氏亦卒子男一國紀孫男八樞棟朴早卒某某昌寧永寧孫女五國維字輔卿歷十官嘗以德安屯田總管出議鹽法山東其所

因革定著為令材問蔚然為時知名人故卹典行得褒
贈府君自朝散大夫冀州尹上騎都尉清河郡伯以載
膺今秩蓋古之人祿不逮養則無以及乎親而迺茲克
自樹立尚徼夫沛渥以有爵級勸忠興孝之道抑良顯
矣繫之銘銘曰

君子觀時用謙治盈惟卒舒舒不潰爾成繫彼流坎既
抵既平疏為濤瀾亦順無傾昔公仕初豈有過計必即
其優必要其至矧是沒身間閱二紀乃承寵章乃顯奕

世本於天者有抑斯崇氣至誠存聲竅徐通不錮其微
不枿其克穰之藁之獲之屢豐是豐匪多公子令善世
猷以升惟克允踐大帝畀矜侯圭侯冕賁於泉幽碩碩
憲憲公侯之宗墓則有儀桓碑六尺載趺以龜爰刻斯
銘豐塗用犧來省來瞻孫曾具宜

塔銘

萬壽長老佛心寶印大禪師生塔碑銘

并序

佛心寶印大禪師正席萬壽十有七年諸緣既稔百廢

具修言隨道流緇素歸仰其大弟子等因入室次合掌
稽首而白師曰身如虛空緣有患生剎那歷劫形蛻神
留昔吾佛祖觀法達變雖存不存示作標指是宰堵波
何間生滅以幻待幻有非幻者我諸比丘將為大師鑿
深攻堅豫卜藏域譬則聚沙即以成佛豈不百年非見
實見於是禪師植拂微笑為作證明塔成其崇三十尺
而趾之廣三分綢二在高梁河西漆園昔金天會中萬
壽初祖青州辯和尚提洞山宗旨鳴道發源閱代二十

有八而禪師實繼其緒以大其承禪師名思慧字訥翁

建寧浦城黃氏子家世文儒學甫究轉徙齊魯遂依東
平鞍山新公年十九新為祝髮授具出見東峰滿靈巖
順皆嘖嘖器許瓶笠遊京首參林泉倫公復從東川讓
公拈機英朗川信以衣領命開堂勘驗學者出世夾山
遷盤山又遷中山乾明退隱萬壽會萬壽席虛衆請補
處三邈而後即事凡脩嚴祖德會同二塔築丈室東軒
作聖壽下生院新邸舍復侵田種種勝因皆以慈忍力

而得成就名德彰升仁宗皇帝詔錫銀章領曹洞正宗
諸方衲子來學京師以萬壽為法奧青州為不死嗣音
有人信哉天童雲外岫公在江之南最號洞山星鳳將
示化遺戒其徒奉書疏走半萬里起禪師修丹霞宏智
故事禪師曰我住山三十年如孤舟抵岸倚著自在何
能以身而更徇物即拈香為岫說法謝遣來意然則是
諸比丘累塔信道而期之永壽者不猶賸乎解梁柳貫
時官頌臺輯所聞睹爰作序偈偈曰

塔在世間吹累一塵載地不壓學山與鄰陶甃琢石有

裏有因成之自我爾以為神若何所見分別同異謂是
法身無生滅義生知涅槃滅見舍利人塔強名等無二
器衆諦之來顛倒其中以鏡取照影實形空我訊萬壽
非廓而通我瞻靈峯非積而克是浮圖身號寶印愜本
無所藏由智願集但見勝光從一毫入如琉璃樹如黍
珠粒自性圓明著處現前一爪髮膚毛孔萬千對此瓦
石說法熾然我爾重來後五百年

墓表

元贈承事郎婺州路浦江縣尹金府君阡表

府君姓金氏自其上世占民數婺州浦江縣至府君尤
愿慤有稱於鄉蓋晚而見其子德潤仕學有端緒遂以
考終延祐三年去其葬八年德潤實來京師具凡世業
行治丐文翰林學士承旨廣平程公亦既植碣隧上又
七年為至治三年今天子始正大寶下詔改元嘉惠臣
工寵及其先申定嘉卹之制自一品而下正從品各七

階官勲爵次差於是德潤以承事郎為常州路宜興州判官品在第七得贈父母妻明年五月命下即用所得官贈府君承事郎婺州路浦江縣尹其配吳氏追封宜人德潤拜受感泣尋以書走京師乞辭於其鄉之友柳貫曰惟吾父流慶啓祉以施及於德潤故德潤自著仕籍四遷而忝今秩遭逢聖代廣孝崇仁遂徼渥澤被飾泉壤實惟疎逖小臣之至榮然累善成德不耀于躬而卒延昭于我後人者抑有自來德潤將謁告大府歸奉

命書哭奠墓次若假茲寔石劉識厥美以示子孫則於
法為宜敢藉是有請貫方執筆隸奉常以誅行銘功為
職而君又以義請而可以讓昔吾鄉先生陳文毅公有
言浦江在婺為山邑非賓客商賈之所奔湊民生其間
往往撲茂質實力農務本恥於華言偽行而長吏至則
相與安樂之雖古書傳所載禮義之俗不過如此蓋自
以為他邑所未見以貫幼所逮聞則若府君之輩流儕
伍幾足以當之而今四十年中日遷月革寢與向異力

農務本之習亦少衰矣觀府君克篤於其身而有俟於
其子孫則樸茂質實之遺其報施久近豈不卓然可徵
哉然則為之後者無愧于其先則無愧于其鄉所以承
藉國家之休寵以自茫賴其來裔者庶其在是府君有
三男子其中子則德潤也吏部方錄其平獄之效將叙
勞進秩駸駸用於時金氏忠孝之澤其益滋乎泰定元
年歲在甲子秋七月初吉徵事郎太常博士柳貫撰

代張公作宮原墓表

先君棄諸孤時某蓋始仕祿不逮養也於是太夫人方
未衰某迎侍官漢鄢遂來京師忽念歸曰吾厭人事不
復出已既數年即世距先君卒十有九年後六年為至
大三年始忍死啟先君之殯合葬于官原兆次其明年
某登朝叅議樞密院入中書為左司郎中屬武宗皇帝
推恩內外詔凡臣工咸得追寵其先遂贈先君中順大
夫上騎都尉封清河郡伯太夫人清河郡君亡幾某自
免歸奉誥哭奠墓下且將脩治先廬冀朝夕護視松柏

重伸霜露之思而兩浙轉運使命下復隨傳去又六年

今天子大廣孝治申定褒典自一命以下正從品各七

階官勲爵次差某適以非才備數叅議中書省事秩視

三品得封贈二代於是先祖贈中順大夫禮部侍郎上

騎都尉封河內郡伯祖妣劉夫人河內郡君先君贈亞

中大夫祕書太監輕車都尉封河內郡侯先妣河內郡

夫人又明年某由叅知政事除工部尚書數月遷宣政

副使品在第二有司加贈封如制進先祖嘉議大夫禮

部尚書上輕車都尉河內郡侯祖妣河內郡夫人先君
中奉大夫中書參知政事護軍河內郡公先妣封如故
某才智淺下弗克肖似每惟先君訓言在耳敬已勤上
夙夜劬劬故自出入班省餘三十年致茲忝竊塵列侍
從有祿有位是皆祖考積善成仁不享其隆以施及於
某遂得遭值聖明澤霑幽壤重封累爵褒榮光大實維
國家寵綏臣子之至恩然稽厥世美則所以委祉乘貺於
我後人者抑有自矣先君履行卒葬之詳有隧道之碑

此不著著其顯受命數於兩朝而可以庇賴來裔者如
右延祐五年歲在甲午三月十五日丙子男中奉大夫
宣政副使某表

武德將軍劉公墓表

武德將軍益都淄萊萬戶府管軍千戶劉公既歿葬之
幾年其孫源襲爵鎮守龍興將北歸其鄉樹碑公墓著
其功代表示來世翰林直學士李君伯瞻為之請辭于
余蓋千戶初起民伍署為軍校在滕國武愍公麾下號

為材勇善騎射每攻城掠地常先登陷陣最其功籍至
錫金符長千夫固宜錄之忠武將佐之畧矣學士武愍
孫也余嘗撰次武愍功行文之建昌新廟之碑知其善
戰善陣而能克成厥勲者抑豈無資於爪牙之助哉謹
按千戶諱用世家遼東自其父諱福始以親王移用哥
營驅戶官來居淄川故今為淄川人福既老千戶遂承
其職至元六年以丁戶隸軍簿郡檄權署千戶九年武
愍受詔南攻襄樊千戶實以其軍從三月破土城先登

以功受賞十年正月破樊城又有功第其次上之乃真
受宣命以千戶領元管軍十二月破武磯堡據其木柵
四重決濠水灌城中即以其所樹雲梯登陴殺獲甚衆
會行省官分道進兵千戶復從戰丁家洲殲其軍奪其
戰艦功狀上十二年命下進爵武畧將軍十五年九月
還從武愍南征次廣州敗王侍郎軍閭部口又敗凌制
置軍海珠寺下十六年正月與宋兵接戰崖山千戶手
獲其都統制祝永昌副將孟德又得陷陣軍人韓松以

歸而宋之遺燼湮滅無餘矣凱旋第功卽加武德將軍
錫佩金符鎮守龍興千戶二子長世恩有膂力能挽強
命中自武愍南攻常挾弓矢以從崖山之戰武愍出奇
計作射棚度與南船相當選善射者七八人命之射而
世恩與焉絃不虛發自卯至午陸秀夫遂抱宋衛王赴
海死初以行省知印權署銀牌總把命未下旋得耳疾
以其弟世英襲父職屢以功進爵在軍餘二十年慨然
曰昔吾父吾兄少長行間間關百戰出萬死中賴國威

靈受主帥成算以獲斯寵今吾兄之子已能荷戈帶甲
宜從世嫡之例還其祿秩吾退居田里私心安焉故源
得踐其世官在軍九年舉職不懈又能得士卒心可謂
克承其家者哉千戶娶楊氏墓在淄川之明水鄉黃朱
店南阜下予觀自古偶夫興王之運而顯建功業之臣
豈出於單智獨斷哉必有為之輔翼左右者矣方武愍
征南之師秉仁蹈義所向無敵計其一時如千戶之以
戰多名在賞典者無慮數十人而今未及五六十 years 世

已鮮有傳者則夫託之金石以貽永久寧惟子孫之責
亦因世論之公升降所繫余雖不敏尚安得而辭天歷
二年歲次己巳夏四月丙午文林郎江西等處儒學提
舉柳貫撰

太康王氏扶城墓表

異時蔡金訖錄河汴塞流天兵所次勢如奔電創殘艾
滅豈間良窳故夫間居巷處之夫有能出一智建一策
全百十于膏血之中則天必封培其後使世食祉報有

加無已蓋以為均覆均載並生並育平時則友助相資
遭變則保抱弗貳吾寧枕藉以駢就死所而不忍睽隔
以獨覲生存此所謂義也而亦分也天顧何能私寄豐
嗇於是人哉太康為縣在夷門以東縣有小扶城故嘗
置縣其地岡阜完厚水泉冽甘其封樹隆然以高者王
氏之墓而王氏縣人也初歲在壬辰汴京已破師壓縣
境民奔竄四出莫知向方王氏有諱義曰七府君者獨
先與其六兄鑿地為窟室度可容數百人凡親屬里黨

之願以身來歸者悉納寘其中又時出營取糗糧以賙
餉之他日六兄竊歸其舍道遇哨兵為所掠致府君奮
百死以計拔之而兵亦卒不能害亂既定凡府君之家
與依之以生者完輯如初而比近井落至百里無人聲
府君七兄弟居同室食同煬同生同死自少至老莫名
一異由府君之順成之也中統始元南京諸路都總管
府檄署府君太康縣尹府君為時賦調以供軍最耕植以
重本縣以理聞無幾棄去退然邑里間人人知為謙謹長

者中斥已田給宗嫺昇之券不為毫髮吝惜至元十一年春秋七十又八卒家即葬先墓之次其配李氏少為令婦老為賢母後府君三十六年而卒年八十六至治二年第三子元亮升朝以恩贈府君從仕郎追封李氏宜人泰定二年元亮進奉訓大夫江西等處行中書省檢校官品在第五加贈府君階奉訓大夫官汴梁路鄭州知州勲飛騎尉爵太康縣男李氏加封太康縣君於是去府君卒葬餘五十年而天恩便蕃寵及門祚生有

祿養歿有號榮向之阡聯軫接者或泯泯無繼或僅僅
未墮獨王氏之宗前承後引聲光日起支庶日滋謂樹
德不由乎人吾不信也然則府君之全活屬黨於萬殞
一存之初亦顧吾分義之可為而為之耳初何嘗有計
較封培之心焉觀其所致逆其所施嗚呼果哉府君三
男子長成行司農司宣使早世次中殤又次檢校君也
二女皆嫁里中宣使子男三女二孫男女各四檢校子
男三女四孫男二檢校字長卿以明法選使臺部由中

書左曹掾為斷事官經歷光祿寺主事嘗鉤校徵理麴材欠緡為鈔三千定而畸語聞有旨登之賞典時論推其清幹方積年勞馴致顯榮余見府君之累爵重封未艾也泰定四年余以文學繫官江右長卿不鄙而與之遊具論其世如此請余辭表諸墓上余又聞長卿言家有金源補官誥知其上世嘗封上護國而亡其諱誥雖不完至今存焉則王氏之啟慶其源固有自來乃為考次行業使歸刻冢石以俟且以厲時人其有發哉明年

泰定五年歲次戊辰春二月日在丁酉文林郎江西等處儒學提舉柳貫撰

雙峯先生墓表

雙峯先生卒于至元丙子而葬于大德丁酉死骨既朽塚木加圍距今將三紀孤崇善亦且老矣乃始勤勤介其外嫺項炯可立請予曰昔吾翁學得于已而信於人謂其必將有以自見就令不大潤澤于時顧豈不能取世一科一級如射者之必至於彀而巧與力違垂得

復失晚遭改物以幽鬱死尚幸家書一二僅存餘澤未
盡殄滅惟是隧間之石未有刻辭敢以狀私於執事使
崇善他日有以下見吾翁而吾翁託不朽焉是在執事
而已予忝可立久敬之交而皆業于文不鄙見委其何
敢不諾然而聲迹不相聞也輩行不相接也徒將考言
諷行則有馬氏之狀在馬氏名良驥先生之友而參政
眉山楊公之客也詎欺我哉按先生車氏初諱若綰字
經臣後更名掾而字既行矣學者尊之配其德稱雙峯

先生車氏籍于台之黃巖謳韶里斷自永嘉徙來計
其時固唐末五季之交也曾祖諱瑾隱馬家山有至行
名載郡乘祖諱似度父諱景山皆老於儒先生少警敏
而學又早成年十六與其父偕以名上春官不中第慨
然曰吾家數世湮鬱不遇我豈能終與造物競哉然聞
皇帝王伯之畧道德性命之奧由學以致顧吾力有未
至耳乃與從父兄諱若水字清臣合志而共講焉久之
覺胸中浩浩發而為言閎放無涯涘于是車氏之學擅

雄於州里間王華父守台新上蔡書院城東東湖上首
以賓禮致之雖政事微有闕失亦藉以彌縫調劑凡皆
以學故也咸淳末泐特恩授官得迪功郎調建寧府浦
城縣尉郡守趙公景緯薦其學行而丞相王公燭亦雅
知先生有吏才將延入史館奏方上而國事去矣丙子
間兵棘俶興盜鋒孔熾先生蹙蹙不能容去之曾祖隱
處馬家山隱焉遂以其年十一月癸卯卒馬家山得壽
五十五子男五濬老瑛老天淳孫為從父兄後與先生

同學而成者也次崇善瑤老配賀氏臨海大姓女先生
卒時崇善瑤老尚幼賀夫人攜之三徙遂依外氏以再
造其家進二子於學有母道焉卒至元癸巳八月庚戌
年六十一合墓故所居里鳳凰山之原十月甲辰葬之
日也孫男七伯湛公果公采伯殷伯禮伯成延年孫女
五皆嫁為士人妻曾孫男七女二當先生自力於學時
里中仕者雲起門戶烜赫過者不敢側睨未五十年已
聲銷景絕丘墓所在夷為畦遂而先生之世卒然秉禮

方以昭德炳幽為事則天之定勝久矣初先生之季父
韶溪先生諱安行早登潛室陳氏之門陳氏為紫陽文
公高第弟子其授受最有原本清臣既委已就學得其
宗要而先生又繼起從之凡天人之精蘊義理之淵微
毫研縷究部發窾露知之而必可言言之而必可行若
天地陰陽日月星辰之運行春秋疆理禮樂刑政之分
合孔門諸弟河汾關洛之緒傳荀揚佛老縱橫捭闔之
機籥會萃衆說歸於至當則有性理要指訂覈禮經分

別制度謂喪服之親疏隆殺深衣之續衽鉤邊雖家禮之證定註疏之引援亦庸有所未盡用廣頭在下之說以改正深衣辨內外正降之義以圖列服制其學蓋深於禮矣清臣世謂王峰先生所著書若宇宙畧紀別自傳學者而先生之書或在或亡則台人類能言之而世未有深知之者系曰學以善己而行非其覲也言則成文要以知其類也屈信者時是尚論其世也銅深藏密繫後人之利也

金谿羽人查廣居墓表

查君臨川人姓查氏諱居廣字廣居少入金谿望仙觀
受度為道士復去之上饒龍虎山中從廬阜黃尊師石
翁學為詩尊師愛其類已授之醵率裁以尺度君更感
激自奮嘗東遊至鄞海上還渡潮憩虎林山久之得楊
推官仲弘詩七言今體服其雄浩又得范太史德機詩
五七言古今體服其清俊皆手抄口誦心領神解期與
之俱化泰定丙寅余以提舉學事蒞豫章君將游匡廬

過之與極論詩道而余銳欲冀君以進會時暑不果往
因索其詩西之清江百丈山求太史之廬而卒業焉太
史亦欣然定其可傳者五十餘篇序為學詩初藁以張
君之志明年君即館豫章還往益熟論議益切又明年
余受代去君悒悒不勝情余曰君方外人豈不能復入
東謀一再會乎君強笑頷之初與君同為詩者危素太
朴後與君上下頡頏者王漸玄翰揭車子舟余最善是
四人以為江右後來之秀而素乃以書言君死矣余為

之西向哭哭已則曰天果不欲昌吾詩乎胡為使君之
駕將騁而遂蹶乎又胡為不葆君之玉未磷而已缺乎
余壹莫知其故也君早孤質厚而近迂所交多畸人靜
士雅嗜佳山水杖履所歷攬擷奇秀資之賦詠無遯思
焉使幸至中壽不懈而及於古獨詩也乎哉君以天歷
己巳秋得疾卧鐵柱延真宮其冬十二月道友鄧居明
與其徒葛世蕃迎歸仁壽觀卒其月庚戌年四十六明
年正月戊午為窆葬犀原臨川處士孫君履常奎章閣

郎官揭君曼碩武夷徵士杜君原父尤知君君之葬素
既銘而納諸幽矣又欲余言表墓以賁君於地下素之
善君有始終哉是年至順改元歲陽庚午秋九月既望
東陽柳貫述

傳誌

亡妻墓輓志

貫亡妻盛氏諱淑嫠之蘭溪人生十有九年而歸貫得
年六十一終於寢以重紀至元三年丁丑歲冬十二月

甲申葬下梅塢子男三卣同因孫男二秬穎穆穎秬天
始貫為國子博士恩封宜人再以貫出提舉江西等處
加封浦江縣君生宋咸淳庚午八月一日歿至順辛未
十一月九日兆成先寔侯吾他日同寔大常博士柳貫
誌于玄輓納諸其幽

待制集卷十二